

Segun Sr. Gerard Halley Director di Olive Tree Funeral Home

Costo di cremacion ta ser spera pa ta mas economico aunke no semper esaki ta e caso



Olive Tree Funeral Home na Cumana.

ORANJESTAD — Manera BON DIA ARUBA a publica den nos edicion di ayera, Parlamento di Aruba a aproba ley di cremacion. Un servicio cu nos hermana islanan tin pa algun aña caba y cu awor lo ta obtenibel na Aruba tambe. Den cuadro di esaki BON DIA ARUBA a papia cu Sr. Gerard Halley, Director di Olive Tree Funeral Home cu a bisa cu e costo di un servicio di cremacion hopi biaha ta ser spera pa ta mas economico cu un entierro cu nos conoce actualmente na Aruba pero esaki no semper lo ta e caso.

EVALUACION

Nan ta den nan fase di evalu-

acion pa mira kico lo cumbini Aruba mas, mirando cu una bes e ley aki formalisa nan lo brinda e servicio aki na comunidad. Sinembargo tecnologia ta avansa y tin hopi opcion riba mercado. “Den pasado e curpa di e difunto tabata solamente wordo kima pero awor aki, por ehempel na Hulanda diferente kimiconan ta wordo uza cu ta practicamente funciona mescos cu e mashin di cremacion pero e ta miho pa medio ambiente,” Halley ta remarca.

COSTO

Remarcabel ta cu e costo di un servicio di cremacion hopi biaha ta ser spera pa ta mas

economico cu un entierro cu nos conoce actualmente na Aruba. Sinembargo Halley ta remarca cu esaki no semper lo ta e caso. Pa loke ta trata e costo di un mashin di cremacion mes esaki no ta nada barata. E por core entre 150 mil dollar pa 500 mil dollar. Y contrario na coriente normal di 110 volt e mashin aki ta 440 volt. Y aunke cu esaki ta funciona den un combinacion di gas toch e ta ranca hopi coriente. “E problema cu nos tin aki na Aruba ta cu e coriente ta hopi caro, y asina mes cu Corsou su coriente ta un tiki mas barata cu Aruba, e servicio di cremacion na Corsou mes no ta barata. Prijs di costo mes ta core entre 4 pa 5 mil florin,” Halley ta señala.

BRANDSTOFCLAUSULE

Halley ta sigui bisa cu “Den otro areanan cremacion ta mas barata pero pa loke ta trata e region di Caribe, a menos cu nos coriente baha como debe ser, e lo bira un opcion pa un entierro mas economico, pero si esaki no ta e caso, e no lo bay ta algo mas barata. E ta bay ta mesun cos of hasta un tiki mas caro, pa-sobra nos brandstofclausule



Olive Tree Funeral Home ta den nan fase di evaluacion pa mira kico lo cumbini Aruba mas pa cuminsa brinda servicio di cremacion.

ta haltisimo.”

SERVICIO VIA CORSO

Siempre y cuando, tin cliente cu ta pidi pa e servicio di cremacion. Mirando cu e servicio aki ainda no ta obtenibel na Aruba, e servicio ta wordo brinda via di Corsou.

Anochi di belorio ta wordo teni na Aruba y un dia despues ta bula pa Corsou caminda cu e acto di cremacion ta tuma luga. Dentro di 3-4 dia esaki ta wordo manda cu avion y famia ta bin busca e ‘ashes’ y dicidi si nan kier der’e of ten’e na cas.

DETAYES

Detayes pa concretisa e ley lo tuma su tempo ya cu tin diferente aspecto cu tin mester di nan regla y regulacion. Manera entre otro, ora famianan cu ta desea di tira e ‘ashes’ nan di nan defunto segun su deseo, mester regla unda esaki lo por bay ta posibel y unda no.

“Tambe den caso di asesinato unda ta pidi pa curpa wordo crema mes ora, caminda e por ta sirbi autoridadnan como evidencia tambe ta otro aspecto cu lo mester tene cuenta cun’e ora di caba di formalisa e ley,” asina Halley a termina bisando. □